

Latiue feleym zuntuchel Sermo sup sepulchrum.
 Nic vogmuc. ysa pur es chomuy uogmuc. Nyeny milostben
 terunteve deve niv isemucut adamut. es odutta vola neki
 paradysumut hazoa. Es mend paradysumben uolav gumilcutul
 munda neki elnie. Heon tilutoa wt ig fa gumilce tvl. Ge-
 munda neki meret nu eneye. ysa ki nopun emdul oz gumilf
 tvl. halabec halalaalholz. Hadlana chohtat terunteve isten
 tvl. ge feledeve. Engede urdung intetvinea. es evec oz tiluyt
 gumilftvl. es oz gumilfben halalut evec. Es oz gumilfnec vvl
 keseruy uola vize. hug turchucat mige zocoztia vola.
 Num heon muga nec. ge mend w foianec halalut evec.
 Horogu vec isten. es vetete wt ez muncas vilagbele. es levn
 halabec es puculnec feze. es mend w nemenee. Kic oz ve.
 niv vogmuc. Hug es tiv latiatuc szuntuchel. isa es num
 igg ember mulchotia ez vermut. ysa mend oz chuz iarov
 vogmuc. Vimagguc uromc isten kegimnet ez lelic ert. hug
 iorgosfun w neki. es kegiggen. es bulscassa mend w bunet.
Esvimagguc szen achkin mariat. es bovdug michael archangelt.
 es mend angelt. hug umaggonoc erette. Es umagguc
 szent peter urot. kinec odut hotolin ovdonia. es kernie.
 hug ovga mend w bunet. Es vimagguc mend szentucut.
 hug legenee neki seged uromc scine eleut. hug isten i v u-
 madfaguemia bulscassa w bunet. Es zoboducha wt urdung
 ildetut tvl. es pucul kanzotvial tvl. es vezesse wt paradisu
 nugulmabeli. es oggun neki munhi uruzagbele utot. es
 mend iovben rezet. Es keassatuc uromchuz charmul. Kurt.
Seerelmes bratym umagguc^{omuc} ez segin ember lalki ert.
 Kite vr ez nopun ez homus vilag tunnucebelevl mente.
 Kinec ez nopun testet tumetive. hug ur uvt kegimnehel
 abraam. ysaac. iacob. kebedeben helhezie. hug birsagnop
 ivtua mend vv szentii es unutteii cuzicun ioy
 felevl iochtotma ilezie wt. Es tiv bennetuc. clamate **iii k**